

南竹離桐

方騷

草草

木木

狀譜疏譜



狀木草方南

撰含嵇

叢書集成初編

(補印本)

南方草木狀及其他三種

一九三九年十二月初版
一九六〇年一月補印

商務印書館出版

上海市印刷六廠印刷

叢書集成

初編

商務印書館

南方草木狀

本館叢書集成初編所選
百川學海及漢魏叢書龍
威祕書皆收有此書百川
宋本故據以排印

南方草木狀目錄

卷上

草類

甘蕉

豆蔻花

甘藷

蒟醬

諸蔗

肥馬草

乞力伽

蕪菁菰附

薤

良耀草

耶悉茗

山薑花

水蓮

菖蒲

草薺

冬葉

楨桐

茄

冶葛

蕙

末利

鶴草

水蕉

留求子

芒茅

蒲葵

水葱

綽菜

吉利草

卷中

木類

楓人

榕

朱槿

沉香

棧香

雞舌香

蘇枋

棹

紫藤

抱香履

楓香

益智子

指甲花

雞骨香

青桂香

桃榔

水松

杉

榼藤

薰陸香

桂

蜜香

黃熟香

馬蹄香

訶梨勒

刺桐

荊

蜜香紙

卷下

檳榔

楊梅

橄欖

千歲子

海梧子

石栗

竹類

雲丘竹

思摩竹

荔枝

橘

龍眼

五斂子

海松子

人面子

簕竹

簕竹

椰

柑

海棗

鉤緣子

菴摩勒

石林竹

越王竹

南方草木狀卷上

晉 永興元年十一月丙子振威將軍襄陽太守嵇 含撰

南越交趾植物有四裔最爲奇。周秦以前無稱焉。自漢武帝開拓封疆。搜來珍異。取其尤者充貢。州之人或昧其狀。乃以所聞詮敘。有裨子弟云爾。

甘蔗望之如樹。株大者一圍餘。葉長一丈。或七八尺。廣尺餘。二尺許。花大如酒杯。形色如芙蓉。著莖末。百餘子。大名爲房。相連累。甜美。亦可蜜藏。根如芋魁。大者如車轂。實隨華。每華一圍。各有六子。先後相次。子不俱生。花不俱落。一名芭蕉。或曰巴苴。剝其子上皮。色黃白。味似蒲萄。甜而脆。亦療飢。此有三種。子大如拇指。長而銳。有類羊角。名羊角蕉。味最甘好。一種子大如雞卵。有類牛乳。名牛乳蕉。微減羊角。一種大如藕。子長六七寸。形正方。少甘。最下也。其莖解散如絲。以灰練之。可紡績爲絺綌。謂之蕉葛。雖脆而好。黃白。不如葛赤色也。交廣俱有之。三輔黃圖曰。漢武帝元鼎六年。破南越。建扶荔宮。以植所得奇草異木。有甘蔗二本。

耶悉茗花。末利花。皆胡人自西國移植於南海。南人憐其芳香。競植之。陸賈南越行紀曰。南越之境。五穀無味。百花不香。此二花特芳香者。緣自胡國移至。不隨水土而變。與夫橘北爲枳異矣。彼之女子。以綵絲穿花心。以爲首飾。

末利花似薔蘿之白者。香愈於耶悉茗。

豆蔻花其苗如蘆。其葉似薑。其花作穗嫩。葉卷之而生。花微紅。穗頭深色。葉漸舒。花漸出。舊說此花食之。破氣消痰。進酒增倍。泰康二年。交州貢一簍。上試之有驗。以賜近臣。

山薑花莖葉卽薑也。根不堪食。於葉間吐花。作穗如麥粒。軟紅色。煎服之。治冷氣甚效。出九真交趾。鶴草蔓生。其花麴塵色。淺紫蒂。葉如柳而短。當夏開花。形如飛鶴。鶯翅尾足。無所不備。出南海。云是媚草。上有蟲。老蛻爲蝶。赤黃色。女子藏之。謂之媚蝶。能致其夫憐愛。

甘藷蓋薯蕷之類。或曰芋之類。根葉亦如芋。實如拳。有大如甌者。皮紫而肉白。蒸鬻食之。味如薯蕷。性不甚冷。舊珠崖之地。海中之人。皆不業耕稼。惟掘地種甘藷。秋熟收之。蒸曬切如米粒。倉圖貯之。以充糧糗。是名藷糧。北方人至者。或盛具牛豕膾炙。而末以甘藷薦之。若粳粟然。大抵南人二毛者。百無一二。惟海中之人。壽百餘歲者。由不食五穀。而食甘藷故爾。

花之美者。有水蓮。如蓮而莖紫。柔而無刺。

水蕉如鹿葱。或紫或黃。吳永安中。孫休嘗遣使取二花。終不可致。但圖畫以進。蒟醬華莢也。生於蕃國者。大而紫。謂之華莢。生於番禺者。小而青。謂之蒟焉。可以調食。故謂之醬焉。交趾九真人家多種蔓生。

菖蒲番禺東有澗。澗中生菖蒲。皆一寸九節。安期生採服仙去。但留玉舄焉。

留求子形如梔子稜瓣深而兩頭尖似訶梨勒而輕及半黃已熟中有肉白色甘如棗核大治嬰孺之疾南海交趾俱有之

諸蔗一曰甘蔗交趾所生者圍數寸長丈餘頗似竹斷而食之甚甘箝取其汁曝數日成飴入口消釋彼人謂之石蜜吳孫亮使黃門以銀碗并蓋就中藏吏取交州所獻甘蔗餚黃門先恨藏吏以鼠屎投餚中啓言吏不謹亮呼吏持餚器入問曰此器既蓋之且有油覆無緣有此黃門將有恨汝吏叩頭曰嘗從臣求莞席臣以席有數不敢與亮曰必是此問之具服南人云甘蔗可消酒又名干蔗司馬相如樂歌曰太尊蔗漿折朝醒是其義也泰康六年扶南國貢諸蔗一丈三節

草麴南海多美酒不用麴蘖但杵米粉雜以衆草葉治葛汁漉漉之大如卵置蓬蒿中蔭蔽之經月而成用此合糯爲酒故劇飲之既醒猶頭熱漉漉以其有毒草故也南人有女數歲卽大釀酒既漉候冬陂池竭時實酒罌中密固其上瘞陂中至春漉水滿亦不復發矣女將嫁乃發陂取酒以供賀客謂之女酒其味絕美

芒茅枯時瘴疫大作交廣皆爾也土人呼曰黃茅瘴又曰黃芒瘴

南方冬無積藁瀕海郡邑多馬有草葉類梧桐而厚取以秣馬謂之肥馬草馬頗嗜而食果肥壯矣冬葉薑葉也苞苴物交廣皆用之南方地熱物易腐敗惟冬葉藏之乃可持久蒲葵如栟櫚而柔薄可爲葵笠出龍川

藥有乞力伽朮也。瀕海所產。一根有至數斤者。劉涓子取以作煎。令可丸餌之。長生。賴桐花。嶺南處處有。自初夏生至秋。蓋草也。葉如桐。其花連枝萼。皆深紅之極者。俗呼貞桐花。貞晉訛也。水葱花。葉皆如鹿葱。花色有紅黃紫三種。出始興。婦人懷妊。佩其花生男者。卽此花。非鹿葱也。交廣人佩之。極有驗。然其土多男。不厭女子。故不常佩也。

蕪菁。嶺嶠已南俱無之。偶有士人因官攜種。就彼種之。出地則變爲芥。亦橘種江北爲枳之義也。至曲江方有。菰。彼人謂之秦菰。

茄樹。交廣草木。經冬不衰。故蔬圃之中種茄。宿根有三五年者。漸長。枝幹乃成大樹。每夏秋盛熟。則梯樹採之。五年後樹老子稀。卽伐去之。別栽嫩者。

綽菜。夏生於池沼間。葉類茨菰。根如藕條。南海人食之。云令人思睡。呼爲瞑菜。

蘿。葉如落葵而小。性冷味甘。南人編葦爲筏。作小孔浮於水上。種子於水中。則如萍根浮水面。及長。莖葉皆出於葦筏孔中。隨水上下。南方之奇蔬也。治葛有大毒。以蘿汁滴其苗。當時萎死。世傳魏武能噉治葛至一尺。云先食此菜。

治葛。毒草也。蔓生。葉如羅勒。光而厚。一名胡蔓草。實毒者。多雜以生蔬進之。悟者速以藥解。不爾。半日輒死。山羊食其苗。卽肥而大。亦如鼠食巴豆。其大如狔。蓋物類有相伏也。

吉利草。其莖如金釵股。形類石斛。根類芍藥。交廣俚俗多畜蟲毒。惟此草解之極驗。吳黃武中。江夏李侯。

以罪徙合浦。始入境。遇毒。其奴吉利者。偶得是草。與俛服。遂解。吉利卽遁去。不知所之。俛因此濟人。不知其數。遂以吉利爲名。豈李俛者。徙非其罪。或俛自有隱德。神明啓吉利者救之耶。

良耀草。枝葉如麻黃。秋結子如小粟。煨食之。解毒。功用亞於吉利。始者有得是藥者。梁氏之子耀。亦以爲名。梁轉爲良爾。花白似牛李。出高涼。

蕙草。一名薰草。葉如麻。兩兩相對。氣如蘼蕪。可以止癘。出南海。

凡草木之華者。春華者冬秀。夏華者春秀。秋華者夏秀。冬華者秋秀。其華竟歲。故婦女之首。四時未嘗無華也。

南方草木狀卷中

楓人五嶺之間多楓木。歲久則生瘤癭。一夕遇暴雷驟雨。其樹贅暗長三五尺。謂之楓人。越巫取之作術。有通神之驗。取之不以法。則能化去。

楓香樹似白楊。葉圓而歧分。有脂而香。其子大如鴨卵。二月華發。乃著實。八九月熟。曝乾可燒。惟九真郡有之。

薰陸香出大秦。在海邊。有大樹。枝葉正如古松。生於沙中。盛夏樹膠流出沙上。方採之。

榕樹南海桂林多植之。葉如木麻。實如冬青。樹幹拳曲。是不可以爲器也。其本稜理而深。是不可以爲材也。燒之無焰。是不可以爲薪也。以其不材。故能久而無傷。其蔭十畝。故人以爲息焉。而又枝條旣繁。葉又茂細。軟條如藤。垂下漸漸及地。藤梢入土。便生根節。或一大株有根四五處。而橫枝及鄰樹。卽連理。南人以爲常。不謂之瑞木。

益智子如筆毫。長七八分。二月花。色若蓮。著實五六月熟。味辛。雜五味中。芬芳。亦可鹽曝。出交趾合浦。建安八年。交州刺史張津嘗以益智子粽餉魏武帝。

桂出合浦。生必以高山之巔。冬夏常青。其類自爲林。間無雜樹。交趾置桂園。桂有三種。葉如柏葉。皮赤者爲丹桂。葉似柿葉者爲茵桂。其葉似枇杷葉者爲牡桂。三輔黃圖曰。甘泉宮南有昆明池。池中有靈波殿。

以桂爲柱。風來自香。

朱槿花。莖葉皆如桑。葉光而厚。樹高止四五尺。而枝葉婆娑。自二月開花。至中冬卽歇。其花深紅色。五出。大如蜀葵。有藥一條。長於花葉上。綴金屑。日光所燦。疑若焰生。一叢之上。日開數百朵。朝開暮落。插枝卽活。出高涼郡。一名赤槿。一名日及。

指甲花。其樹高五六尺。枝條柔弱。葉如嫩榆。與耶悉若末利花皆雪白。而香不相上下。亦胡人自大秦國移植于南海。而此花極繁細。纔如半米粒許。彼人多折置襟袖間。蓋資其芬馥爾。一名散沫花。

蜜香。

沉香。

鷄骨香。

黃熟香。

棧香。

青桂香。

馬蹄香。

鷄舌香。

案此八物。同出於一樹也。交趾有蜜香樹。幹似柅柳。其花白而繁。其葉如橘。欲取香。伐之經年。其根幹枝節。各有別色也。木心與節堅黑。沉水者爲沉香。與水面平者爲鷄骨香。其根爲黃熟香。其幹爲棧香。細枝緊實未爛者爲青桂香。其根節輕而大者爲馬蹄香。其花不香。成實乃香。爲鷄舌香。珍異之木也。

桃榔樹似栟櫚實。其皮可作綆。得水則柔。胡人以此聯木爲舟。皮中有屑如麴。多者至數斛。食之與常麴無異。木性如竹。紫黑色。有文理。工人解之以製弈枰。出九真交趾。

訶梨勒樹似木椀。花白。子形如橄欖。六路。皮肉相着。可作飲。變白髭髮令黑。出九真。蘇枋樹類槐花。黑子。出九真。南人以染絳。漬以大庾之水。則色愈深。

水松葉如檜而細長出南海土產衆香而此木不大香故彼人無佩服者嶺北人極愛之然其香殊勝在南方時植物無情者也不香於彼而香於此豈屈於不知已而伸於知己者歟物理之難窮如此刺桐其木爲材三月三時布葉繁密後有花赤色間生葉間旁照他物皆朱殷然三五房凋則三五復發如是者竟歲九真有之

棹樹榦葉俱似椿以其葉鬻汁漬果呼爲棹汁若以棹汁雜麋肉食者卽時爲雷震死棹出高涼郡杉一名披黏合浦東二里有杉一樹漢安帝永初五年春葉落隨風飄入洛陽城其葉大常杉數十倍術士廉盛曰合浦東杉葉也此休徵當出王者帝遣使驗之信然乃以千人伐樹役夫多死者其後三百人坐斷株上食過足相容至今猶存

荊寧浦有三種金荊可作枕紫荊堪作牀白荊堪作履與他處牡荊蔓荊全異又彼境有杜荊指病自愈節不相當者月暈時刻之與病人身齊等置牀下雖危困亦愈

紫藤葉細長莖如竹根極堅實重重有皮花白子黑置酒中歷二三十年亦不腐敗其莖截置煙食中經時成紫香可以降神

榼藤依樹蔓生如通草藤也其子紫黑色一名象豆三年方熟其殼貯藥歷年不壞生南海解諸藥毒蜜香紙以蜜香樹皮葉作之微褐色有紋如魚子極香而堅韌水漬之不潰爛秦康五年大秦獻三萬幅常以萬幅賜鎮南大將軍當陽侯杜預令寫所撰春秋釋例及經傳集解以進未至而預卒詔賜其家令